

文学典

文學典第一百三十卷

文學總部紀事一

史記田敬仲世家宣王喜文學游說之士自如騶衍淳于髡田駢接子

按孟子傳作接子

慎到環淵之徒七

十六人皆賜列第爲上大夫不治而議論是以齊稷下學士復盛且數百千人

漢書景十三王傳河間獻王德以孝景前二年立修學好古實事求是從民得善書必爲好寫與之留其真加金帛賜以招之由是四方道術之人不遠千里或有先祖舊書多奉以奏獻王者故得書多與漢朝等是時淮南王安亦好書所招致率多浮辯獻王所得書皆古文先秦舊書周官尙書禮禮記孟子老子之屬皆經傳說記七十子之徒所論其學舉六藝立毛氏詩左氏春秋博士修禮樂被服儒術造次必於儒者山東諸儒者從而遊武帝時獻王來朝獻雅樂對三雍宮及詔策所問三十餘事其對推道術而言得事之中文約指明

東方朔傳朔之文辭客難非有先生論此二篇最善其餘有封泰山責和氏璧及皇太子生祿屏風殿上柏桂平樂觀賦獵八言七言上下從公孫弘借車凡劉向所錄朔書具是矣世所傳他事皆非

也

楊敞傳敞子惲字子幼以忠任爲郎補常侍騎惲母司馬遷女也惲始讀外祖太史公記頗爲春秋以材能稱

鮑宣傳薛方居家以經教授喜屬文嘗著詩賦數十篇

後漢書琅邪孝王京傳京都莒好修宮室窮極伎巧殿館壁帶皆飾以金銀數上詩賦頌德帝嘉美下之史官

朱暉傳暉孫穆字公叔及壯耽學銳意講誦或時思至不自知亡失衣冠顛墜阮岸其父常以爲專愚幾不知數馬足穆愈更精篤所著論策奏教書詩記嘲凡二十篇

胡廣傳初揚雄依虞箴作十二州二十五官箴其九箴亡闕後涿郡崔駰及子瑗又臨邑侯劉騶駢增補十六篇廣復繼作四篇文甚典美乃悉撰次首目爲之解釋名曰百官箴凡四十八篇其餘所著詩賦銘頌箴弔及諸訓詁凡二十二篇

楊終傳終爲校書郎言宣帝博徵羣儒論定五經於石渠閣方今天下少事學者得成其業而章句

之徒破壞大體宜如石渠故事永爲後世則是詔諸儒於白虎觀論考同異會終坐事繫獄博士趙博校書郎班固賈逵等以終深曉春秋學多異聞表請之終又上書自訟卽日貰出乃得與於白虎觀焉後受詔刪太史公書爲十餘萬言終兄鳳爲郡吏太守廉范爲州所考遣鳳候終終爲范游說坐徙北地帝東巡狩鳳皇黃龍並集終贊頌嘉瑞上祀祖宗鴻業凡十五章奏上詔貰還故郡著春秋外傳十二篇改定章句十五萬言

應奉傳奉少聰明讀書五行並下著漢書後序多所述載追愍屈原因自傷著感騷三十篇數十萬言

梁統傳統子竦字叔敬少習孟氏易弱冠能教授後坐兄松事與弟恭俱徙九真旣徂南土歷江湖濟沅湘感悼子胥屈原以非辜沈身乃作悼騷賦繫元石而沈之顯宗復詔聽還本郡竦閉門自養以經籍爲娛著書數篇名曰七序班固見而稱曰孔子著春秋而亂臣賊子懼梁竦作七序而竊位素餐者慙

劉陶傳陶著書數十萬言又作七曜論匡老子反韓非復孟軻及上書言當世便事條教賦奏書記

辯疑凡百餘篇

延篤傳篤少從潁川唐溪典受左氏傳旬日能諷誦之典深敬焉又從馬融受業博通經傳及百家之言能著文章有名京師所著詩論銘書應訊表教令凡二十篇云

張奐傳奐少遊三輔師事太尉朱寵學歐陽尚書初牟氏章句浮辭繁多有四十五萬餘言奐減爲九萬言後辟大將軍梁冀府乃上書桓帝奏其章句詔下東觀所著銘頌書教誡述志對策章表二十四篇

孔融傳魏文帝深好融文辭歎曰揚班儔也募天下有上融文章者輒賞以金帛所著詩頌碑文論議六言策文表檄教令書記凡二十五篇

獨異志後漢明帝楊后花面美色有顛狂病發則殺人唯內傳孟召爲文后每讀之顛狂輒醒時人語曰孟召文差顛狂

武陵記曰後漢馬融勤學夢見一林花如錦繡夢中摘此花食之及寤見天下文詞無所不知時人號爲繡囊

三國魏志文帝紀初帝好文學以著述爲務自所勒成垂百篇又使諸儒撰集經傳隨類相從凡千餘篇號曰皇覽

高貴鄉公紀甘露二年五月辛未帝幸辟雍會命羣臣賦詩侍中和道尙書陳騫等作詩稽留有司奏免官詔曰吾以暗昧愛好文雅廣延詩賦以知得失而乃爾紛紜良用反仄其原道等主者宜敕自今以後羣臣皆當玩習古義修明經典稱朕意焉 又註傳暢晉諸公贊帝嘗與中護軍司馬望侍中王沈散騎常侍裴秀黃門侍郎鍾會等講宴於東堂并屬文論名秀爲儒林丈人沈爲文籍先生望會亦各有名號

曹真傳何晏進孫也母尹氏爲太祖夫人晏長於宮省又尙公主少以才秀知名好老莊言作道德論及諸文賦著述凡數十篇

劉放傳放善爲書檄三祖詔命有所招喻多放所爲青龍初孫權與諸葛亮連和欲俱出爲寇邊候得權書放乃改易其辭往往換其本文而傳合之與征東將軍滿寵若欲歸化封以示亮亮騰與吳大將步騭等騭等以見權權懼亮自疑深自解說

陳思王植傳植字子建年十歲餘誦讀詩論及辭賦數十萬言善屬文太祖嘗視其文謂植曰汝倩人邪植跪曰言出爲論下筆成章願當面試奈何倩人時鄴銅雀臺新成太祖悉將諸子登臺使各爲賦植援筆立成可觀太祖甚異之

三國蜀志郤正傳正安貧好學博覽文籍弱冠能屬文入爲祕書吏轉爲令史遷郎至今性澹於榮利而尤耽意文章自司馬王楊班傳張蔡之儔遺文篇賦及當世美書善論益部有者鑽鑿推求略皆寓目

三國吳志張紘傳紘見栲榴枕證其文爲作賦陳琳在北見之以示人曰此吾鄉里張子綱所作也後紘見陳琳作武庫賦應機論與琳書深歎美之琳答曰自僕在河北與天下隔此間率少於文章易爲雄霸故使僕受此過差之譚非其實也今景興在此足下與子布在彼所謂小巫見大巫神氣盡矣紘旣好文學又善楷篆書與孔融書自書融遺紘書曰前勞手筆多篆書每舉篇見字欣然獨笑如復覩其人也

華覈傳覈遷東觀令領右國史覈上疏辭讓皓答曰得表以東觀儒林之府當講校文藝處定疑難

漢時皆名學碩儒乃任其職乞更選英賢聞之以卿研精墳典博覽多聞可謂說禮樂敦詩書者也
當飛翰騁藻光贊時事以越揚班張蔡之儒怪乃謙光厚自菲薄宜勉修所職以邁先賢勿復紛紛
皓以覈年老勅令草表覈不敢又勅作草文停立待之覈爲文曰咨覈小臣草芥凡庸遭眷值聖受
恩特隆越從朽壤蟬蛻朝中熙光紫闥青瑣是憑慈挹清露沐浴凱風効無絲釐貢闕山崇滋潤含
垢恩貸累重穢質被榮局命得融欲報罔極委之皇穹聖恩雨注哀棄其尤猥命草對潤被下愚不
敢違勅懼速罪誅冒承詔命魂逝形留覈前後陳便宜及貢薦良能解釋罪過書百餘上皆有補益
文多不悉載天冊元年以微譴免數歲卒覈所論事章疏傳於世

魏文帝集李尤字伯宗少有文章賈逵薦尤有相如揚雄之風拜蘭臺令史與劉楨等共撰漢記
誠齋雜記沈友字子正吳郡人弱冠博學多所貫綜善屬文兼好武事注孫子兵法又辨於口每所
至衆人默然莫與爲對咸言其筆之妙舌之妙刀之妙三者皆過絕於人吳大帝以禮聘之旣至論
王道之略當時之務大帝斂容敬焉

晉書羊祜傳文帝爲大將軍辟祜未就公車徵拜中書侍郎俄遷給事中黃門郎時高貴鄉公好屬

文在位者多獻詩賦汝南和道以忤意見斥祐在其間不得而親疎有識尙焉

杜預傳預既立功之後從容無事乃耽思經籍爲春秋左氏經傳集解又參攷衆家譜第謂之釋例又作盟會圖春秋長歷備成一家之學比老乃成又撰女記讚時論者謂預文義質直世人未之重唯祕書監摯虞賞之曰左丘明本爲春秋作傳而左傳遂自孤行釋例本爲傳設而所發明何但左傳故亦孤行

王沉傳沉性好學善屬文正元中遷散騎常侍侍中典著作與荀顗阮籍共撰魏書多爲時諱未若陳壽之實錄也時魏高貴鄉公好學有文才引沉及裴秀數於東堂講讌屬文號沉爲文籍先生秀爲儒林丈人

荀勗傳勗孫綽字彥舒博學有才能撰晉後書十五篇傳於世

樂廣傳廣累遷侍中河南尹善清言而不長於筆將讓尹請潘岳爲表岳曰當得君意廣乃作二百句語述己之志岳因取次比便成名筆時人咸云若廣不假岳之筆岳不取廣之旨無以成斯美也傳元傳元少孤貧博學善屬文與東海繆施俱以時譽選入著作撰集魏書元少時避難於河內事

心誦學後雖顯貴而著述不廢撰論經國九流及三史故事評斷得失各爲區例名爲傳子爲內外中篇凡有四部六錄合百四十首數十萬言并文集百餘卷行於世元初作內篇成子咸以示司空王沉沉與元書曰省足下所著書言富理濟經綸政體存重儒教足以塞楊墨之流遁齊孫孟於往代每開卷未嘗不歎息也不見賈生自以過之乃今不及信矣 咸好屬文論雖綺麗不足而言成規鑒潁川庾純常歎曰長虞之文近乎詩人之作矣 咸從父弟祇著文章駁論十餘萬言阮籍傳籍能屬文初不留思著詠懷詩八十餘篇爲世所重著達莊論叙無爲之貴

嵇康傳康善談理又能屬文其高情遠趣率然元遠撰上古以來高士爲之傳贊欲友其人於千載也又作太師箴亦足以明帝王之道焉復作聲無哀樂論甚有條理

王接傳接學雖博通特精禮傳常謂左氏辭義贍富自是一家書不主爲經發公羊附經立傳經所不書傳不妄起於文爲儉通經爲長任城何休訓釋甚詳而黜周王魯大體乖礙且志通公羊而往往還爲公羊疾病接乃更注公羊春秋多有新義時祕書丞衛恆考正汲冢書未訖而遭難佐著作郎束皙述而成之事多證異義時東萊太守陳留王庭堅難之亦有證據皙又釋難而庭堅已亡散

騎侍郎潘滔謂接曰卿才學理議足解二子之紛可試論之接遂詳其得失摯虞謝衡皆博物多聞咸以爲允當又撰列女後傳七十二人雜論議詩賦碑頌駁難十餘萬言喪亂盡失長子愆期流寓江南緣父本意更注公羊又集列女後傳云

郭璞傳璞好經術博學有高才而訥於言論詞賦爲中興之冠

葛洪傳洪博聞深洽江左絕倫其著述篇章富於班馬

桓彝傳彝子祕與謝安書及詩十首辭理可觀其文多引簡文帝之所遇

謝安傳桓溫嘗以安所作簡文帝謚議以示坐賓曰此謝安石碎金也 安弟萬早有時譽工言

論善屬文叙漁父屈原季主賈誼楚老龔勝孫登嵇康四隱四顯爲八賢論其旨以處者爲優出者

爲劣以示孫綽綽與往反以體公識遠者則出處同歸 安從子元元子瑒祕書郎早卒子靈運

嗣瑒少不惠而靈運文藻豔逸元嘗稱曰我尙生瑒瑒那得不生靈運

王羲之傳羲之初渡浙江便有終焉之志會稽有佳山水名士多居之謝安未仕時亦居焉孫綽李充許詢支遁等皆以文義冠世並築室東土與羲之同好嘗與同志宴集於會稽山陰之蘭亭羲之

自爲之序以申其志或以潘岳金谷詩序方其文義之比於石崇聞而甚喜

龔壯傳壯考經研典殫思文章每歎中夏多經學而巴蜀鄙陋兼遭李氏之難無復學徒乃著邁德
論

楊軻傳軻在永昌季龍每有饋餽輒口授弟子使爲表謝其文甚美覽者歎有深致

涼武昭王傳元盛少而好學通涉經史尤善文義先是河右不生楸槐柏漆張駿之世取於秦隴而
植之終於皆死而酒泉宮之西北隅有槐樹生焉元盛著槐樹賦以寄情蓋歎僻陋遐方立功非所
也亦命主簿梁中庸及劉彥明等並作文感兵難繁興時俗諠競乃著大酒容賦以表恬豁之懷與
辛景辛恭靖同志友善景等歸晉遇害江南元盛聞而弔之元盛前妻同郡辛納女貞順有婦儀先
卒元盛親爲之誄自餘詩賦數十篇

李密傳密二子賜興賜字宗石少能屬文嘗爲元鳥賦詞甚美州辟別駕舉秀才未行而終興字雋
石亦有文才刺史羅尙辟別駕尙爲李雄所攻使興詣鎮南將軍劉弘求救興因願留爲弘參軍而
不還尙白弘卽奪其手版而遣之興之在弘府弘立諸葛孔明羊叔子碣使興俱爲之文甚有辭理

徐邈傳孝武帝始覽典籍招延儒學之士邈既東州儒素太傅謝安舉以應選年四十四始補中書舍人在西省侍帝雖不口傳章句然開釋文義標明指趣撰正五經音訓學者宗之遷散騎常侍猶處西省前後十年每被顧問輒有獻替多所匡益甚見寵待帝宴集酣樂之後好爲手詔詩章以賜侍臣或文詞率爾所言穢雜邈每應時收斂還省刊削皆使可觀經帝重覽然後出之是時侍臣被詔者或宣揚之故時議以此多邈

謝安傳安弟子邈累遷侍中時孝武帝觴樂之後多賜侍臣文詔辭義有不雅者邈輒焚毀之其他

侍臣被詔者或宣揚之故論者以此多邈

按二邈俱孝武時人事如一轍當時史臣采錄必有一誤姑兩存之

陶潛傳潛少懷高尚博學善屬文穎脫不羈任真自得爲鄉鄰之所貴嘗著五柳先生傳以自況曰

先生不知何許人不詳姓氏宅邊有五柳樹因以爲號焉閑靜少言不慕榮利好讀書不求甚解每有會意欣然忘食性嗜酒而家貧不能恆得親舊知其如此或置酒招之造飲必盡期在必醉既醉而退曾不吝情環堵蕭然不蔽風日短褐穿結簞瓢屢空晏如也嘗著文章自娛頗示己志忘懷得失以此自終其自序如此時人謂之實錄

殷仲文傳仲文善屬文爲世所重謝靈運嘗云若殷仲文讀書半袁豹則文才不減班固言其文多而見書少也

劉聰傳聰幼而聰悟好學博士朱紀大奇之年十四究通經史兼綜百家之言孫吳兵法靡不誦之工草隸善屬文著述懷詩百餘篇賦頌五十餘篇

苻融傳融聰辯明慧下筆成章至於談元論道雖道安無以出之耳聞則誦過目不忘時人擬之王粲嘗著浮圖賦壯麗清瞻世咸珍之未有升高不賦臨喪不誄朱彤趙整等推其妙速

呂光傳光入龜茲城大饗將士賦詩言志見宮室壯麗命叅軍京兆段業著龜茲宮賦以譏之

文士傳初武帝招延後進二十餘人置酒賦詩不成罰酒一斗臧盾飲盡顏色不變言笑自若蕭介染翰便成文無加點帝兩美之曰臧盾之飲蕭介之文卽席之美也 張秉自知短命乃作千年

歌詩以自傷

桓麟字元鳳伯父焉官至太尉精察好學年十三四在焉坐有宿年客焉告之曰

吾此弟子頗有異才今已涉獵書傳殊能作詩賦爲口賦詩與之客乃爲詩曰甘羅十二楊烏九齡昔有二子今則桓生參差等蹤異世齊名麟卽答曰邈矣甘羅超等絕倫卓彼楊烏後世稱賢嗟予

蠢弱殊才棄年仰慚二子俯愧前言

成公綏口不能談而有劇問以筆答之見其深智

張

儼朱異張純三人共詣驃騎將軍朱據據聞三人才名各爲賦然後乃坐純乃賦席曰席爲冬設簟爲夏施揖讓而坐君子攸宜

之作草

東晉晚應司空除著作佐郎撰晉書草創三帝紀及十志

孫盛爲祕書監薦尙好

學自少長常手不釋卷既居史官乃著三國陽秋

王肅對明帝曰司馬遷記事不虛美不隱惡劉向揚雄服其叙事有良史之才謂之實錄

南史宋臨川王道規傳道規子義慶爲平西將軍荊州刺史加都督在州八年爲西土所安撰徐州先賢傳十卷奏上之又擬班固典引爲典叙以述皇代之美改授江州又遷南兖州刺史並帶都督尋卽本號加開府儀同三司性簡素寡嗜欲愛好文義文辭雖不多足爲宗室之表歷任無浮淫之過惟晚節奉沙門頗致費損少善騎乘及長不復跨馬招聚才學之士遠近畢至太尉袁淑文冠當時義慶在江州請爲衛軍諮議其餘吳郡陸展東海何長瑜鮑照等並有辭章之美引爲佐吏國臣所著世說十卷撰集林二百卷行於世文帝每與義慶書常加意斟酌

南平穆王鑠傳鑠少好學有文才未弱冠擬古三十餘首時人以爲亞迹陸機

徐羨之傳羨之從孫湛之爲南兖州刺史善政俱肅威惠並行廣陵舊有高樓湛之更修整之南望鍾山城北有陂澤水物豐盛湛之更起風亭月觀吹臺琴室果竹繁茂花藥成行招集文士盡游玩之適時沙門釋惠休善屬文湛之與之甚厚孝武命使還俗本姓湯位至揚州從事史

傅亮傳亮博涉經史尤善文辭永初元年加太子詹事入直中書省專典詔命武帝登庸之始文筆皆是參軍滕演北征廣固悉委長史王誕自此之後至於受命表策文誥皆亮辭也見世路屯險著論名曰演慎及少帝失德內懷憂懼直宿禁中睹夜蛾赴燭作感物賦以寄意初奉大駕道路賦詩三首其一篇有悔懼之辭自知傾覆求退無由又作辛有穆生董仲道贊稱其見微之美云

謝晦傳晦兄瞻六歲能屬文爲紫石英贊果然詩爲當時才士歎異與從叔琨族弟靈運俱有盛名嘗作喜霽詩靈運寫之琨詠之王弘在坐以爲三絕

王微傳微少好學善屬文初爲始興王友以憂去職微素無宦情服闋除南平王鑠右軍諮議參軍仍爲中書侍郎微爲文好古言頗抑揚袁淑見之謂爲訴屈 微從孫籍好學有才氣爲詩慕謝

靈運至其合也殆無愧色時人咸謂康樂之有王籍如仲尼之有丘明老聃之有嚴周

王曇首傳曇首太保弘之弟也與從弟球俱詣宋武帝至彭城大會戲馬臺賦詩曇首文先成帝問弘曰卿弟何如卿答曰若但如下官門戶何寄

王准之傳准之曾祖彪之博聞多識練悉朝儀自是家世相傳並諳江左舊事緘之青箱世謂王氏青箱學准之兼明禮傳贍於文辭

袁湛傳湛弟子淑字陽源少有風氣年數歲伯父湛謂人曰此非凡兒至十餘歲爲姑夫王弘所賞博涉多通不爲章句學文采適豔縱橫有才辯彭城王義康命爲司徒祭酒義康不好文學雖外相禮接意好甚疎從母兄劉湛欲其附己而淑不爲改意由是大相乖失淑乃賦詩曰種蘭忌當門懷璧莫向楚楚少別玉人門非植蘭所尋以久疾免官元嘉二十六年累遷尙書吏部郎其秋大舉北侵從容曰今當席卷趙魏檢玉岱宗願上封禪書一篇文帝曰盛德之事我何足以當之出爲始興王濬征北長史南東海太守

沈懷文傳懷文少好元理善爲文章爲楚昭王二妃詩見稱於世隱士雷次宗被徵居鍾山後南還